

〈華嚴經疏玄談總科 / 第三門・義理分齊〉

編按：本科判為美國法界佛教總會/中文網站製作

節自於唐澄觀法師《華嚴經疏》科判之簡略

A3 義理分齊（分二）

B1 總彰大意（分三）

C1 結前生後 第三義理分齊。已知此經總屬圓教，未知圓義分齊云何？

C2 總顯深廣（分三）

D1 法 然此教海宏深，包含無外。

色空交映，德用重重；語其橫收，全收五教。

乃至人天，總無不包，方顯深廣。

D2 喻 其猶百川不攝大海，大海必攝百川。

雖攝百川，同一鹹味；故隨一滴，迴異百川。

D3 合 前之四教，不攝於圓，圓必攝四；雖攝於四，圓以貫之。

故十善五戒亦圓教攝，尚非三四，況初二耶。

斯則有所通，無其所局。

C3 結屬所攝 故此圓教，語廣名無量乘，語深唯顯一乘。一乘有二：

一、同教一乘，同頓同實故；二、別教一乘，唯圓融具德故。

以別該同，皆圓教攝。

B2 開章別釋（分二）

C1 標列章門 今顯別教一乘，略顯四門：一、明所依體事，二、攝歸真實，

三、彰其無礙，四、周徧含容。各有十門，以顯無盡。

C2 依章別釋（分四）

D1 所依體事（分二）

E 1 具列 初中十者：一教義，二理事，三境智，四行位，五因果，
六依正，七體用，八人法，九逆順，十應感。

E 2 略釋 教即能詮，即前五教，乃至光香等；
義即所詮，即五教等一切義理。
理即生空所顯，二空所顯無性真如等理；
事即色心身方等事。餘可思準。

D 2 攝歸真實 第二、攝歸真實者，即真空絕相。經云：
「法性本空寂，無取亦無見；性空即是佛，不可得思量。」
亦有十義，如法界觀。

D 3 彰其所礙（分三）

E 1 總標 第三、彰其無礙。然上十對，皆悉無礙。
今且約事理以顯無礙，亦有十門。

E 2 別釋（分十）

F 1 理徧於事門 一、理徧於事門。謂無分限之理，全徧有分限事中。
故一一纖塵，理皆圓足。

F 2 事徧於理門（分二）

G 1 正明 二、事徧於理門。謂有分之事，全同無分之理。
故一小塵即徧法界。

G 2 會前（分二）

H 1 會一性（分三）

I 1 明一性無性 由上二義，互該徹故，皆同一性。故出現品云：
「如來成正覺時，於其身中，普見一切眾生成正覺，
乃至普見一切眾生入涅槃。皆同一性，所謂無性。」
I 2 明成佛不成佛 理徧事故，一成一切成。事徧同理故，說都無所成。
經云：「譬如虛空，無成無壞。」

I 3 明無性即佛性 一性無性，即是佛性。故涅槃云：

「佛性名第一義空，第一義空名為智慧。」

H2 會一乘 又出現云：「無一眾生不具如來智慧。」

無不有者，即一乘義也。

F 3 依理成事門（分二）

G1 總釋 三、依理成事門。謂事無別體，要因理成，如攪水成波故。

G 2 會前（分二）

H1 會諸法通真心 於中有二：一明具分唯識變故。

覺林菩薩偈云：「心如工畫師，能畫諸世間；

五陰悉從生，無法而不造。」此明唯心義也。

何以得知是具分耶？

次頌云：「如心佛亦爾，如佛眾生然；應知佛與心，

體性皆無盡。」既是即佛之心，明非獨妄心而已。

H2 會真如能隨緣 二明真如隨緣成。故問明品文殊難云：

「心性是一，云何見有種種差別？」即緣性相違難。

覺首答云：「法性本無生，示現而有生。」

即真如隨緣答。

又云：「諸法無作用，亦無有體性。」

明隨緣不失自性。

即同勝鬘，依如來藏有生死，依如來藏有涅槃等。

F 4 事能顯理門（分二）

G1 正明 四、事能顯理門。謂由事攪理成，故事虛而理實。

依他無性，即是圓成；如波相虛，令水現故。

G2 引證 夜摩偈云：

「云何說諸蘊？諸蘊有何性？蘊性不可滅，是故說無生。」

分別此諸蘊，其性本空寂；空故不可滅，此是無生義。

眾生既如是，諸佛亦復然；佛及諸佛法，自性無所有。」

又十忍品云：

「譬如谷響，從緣所起；而與法性，無有相違。」

須彌頂偈云：「了知一切法，自性無所有。」

如是等文，徧於九會。

F 5 以理奪事門（分二）

G1 正釋 五、以理奪事門。謂事既全理，則事盡無遺。

如水奪波，波相全盡。

G2 會前（分三）

H1 正會 故說生佛不增不減。

H2 引證 出現品云：「譬如虛空，一切世界若成若壞，常無增減。

何以故？虛空無生故。諸佛菩提亦復如是，若成正覺、不成正覺，亦無增減。何以故？菩提無相故。」

乃至云：「設一切眾生，於一念中，悉成正覺，與不成正覺，等無有異。皆以無相平等故。」不增不減，經亦同此說。

H3 揀權 非約一分眾生不成佛者，說無增減耳。

F 6 事能隱理門（分二）

G1 正釋 六、事能隱理門。謂真理隨緣而成事法，遂令事顯理不現也。

如水成波，動顯靜隱。

G2 引證 故法身流轉五道，名曰眾生。財首偈云：

「世間所言論，一切是分別；未曾有一法，得入於法性等。」

F 7 事理即事門（分二）

G1 正釋 七、真理即事門。謂凡是真理必非事外，以是法無我理故，

空即色故，理即是事，方為真理。

G2 引證 第七迴向云：「法性不違法相等故。」

F 8 事法即理門（分二）

G1 正釋 八、事法即理門。謂緣集必無自性，舉體即真故。

G2 會前五義（分五）

H1 二諦空有 上之二門，正明二諦不相違義；如濕不違波，波不違濕，舉體相即故。夜摩偈云：「如金與金色，其性無差別；法非法亦然，體性無有異。」

H2 重會唯心 此亦喻於如來之藏與阿賴耶，展轉無別。

H3 會不斷常 又由事即理故，雖有不常；理即事故，雖空不斷。

H4 四相前後 又由事理相即，故起滅同時。須彌偈云：「一切凡夫行，莫不速歸盡；其性如虛空，故說無有盡。智者說無盡，此亦無所說；自性無盡故，得有難思盡等。」則同時四相，不待後無。

H5 能所斷證 亦令究竟斷證，離於能所。

十地品云：「非初非中後，非言辭所及。」

迴向品云：「無有智外如為智所入，亦無如外智能證於如等。」

F 9 真理非事門 九、真理非事門。即妄之真，異於妄故；如濕非動。

F 10 事法非理門（分二）

G1 正釋本門 十、事法非理門。即真之妄，異於真故；如動非濕故。

慚愧林偈云：「如色與非色，此二不為一。」

又云：「如相與無相，生死及涅槃，分別各不同等。」

G2 會無為義 上七八二門，明事理非異。九十二門，明事理非一。

故為無為，非一非異。第四迴向云：

「於有為界示無為法，而不滅壞有為之相。」

於無為界示有為法，而不分別無為之性。」

E3 總結（分二）

F1 總標無礙同一緣起 上之十事，同一緣起，故云無礙。

F2 別束十門以成八字 約理望事，則有成有壞，有即有離；

事望於理，有隱有顯，有一有異。

逆順自在，無障無礙，同時頓起；

深思令觀明現，以成理事圓融無礙觀也。

D4 周徧含容（分二）

E1 標舉章門 第四、周徧含容。即事事無礙。且依古德，顯十玄門。

於中文二，先正辨玄門，二明其所以。

E2 依章別釋（分二）

F1 正辨玄門（分三）

G1 列名總顯 今初。

一、同時具足相應門；二、廣狹自在無礙門；

三、一多相容不同門；四、諸法相即自在門；

五、秘密隱顯俱成門；六、微細相容安立門；

七、因陀羅網境界門；八、託事顯法生解門；

九、十世隔法異成門；十、主伴圓明具德門。

此之十門，同一緣起，無礙圓融。隨其一門，即具一切。

G2 指事別明（分二）

H1 總辨所依 今且於前十中，取一事法，明具後十門。如下文中。

H2 別顯十門（分十）

I 1 同時具足相應門

一蓮華葉，或一微塵，則具教等十對，同時相應，具足圓滿。

亦具後之九門，及彼門中所具教等，以是總故。

故下文云：「一切法門無盡海，同會一法道場中。」

華藏頌云：「華藏世界所有塵，一一塵中見法界。」

一塵尚見，況一葉耶？

I 2 廣狹自在無礙門

二。即彼華葉，普周法界，而不壞本位。以分即無分，無分即分。

廣狹自在，無障無礙。

十定品云：「有一蓮華，盡十方際。」而不妨外有可見。

是故或唯廣無際，或分限歷然，或即廣即狹，或廣狹俱泯。

或具前四，以是解境故；或絕前五，以是行境故。下皆準此。

然此廣狹，亦名純雜。

普周法界，故純一無二；不壞本位，則不妨於雜。萬行例然。

I 3 一多相容不同門

三。即此華葉，舒已徧入一切法中，即攝一切令入己內。

舒攝同時，即無障礙，是故鎔融。或有四句六句，思之。

下云：「以一佛土滿十方，十方入一亦無餘。」

若一與一切對辨，則攝入各具四句。

謂一入一切，一切入一；一入一，一切入一切。互攝亦然。

I 4 諸法相即自在門

四。此一華葉，廢已同他，舉體全是彼一切法。

而恆攝他同己，令彼一切即是己體。

一多相即，混無障礙，解行境別，六句同前。

下云：「知一即多，多即一等。」

I 5 秘密隱顯俱成門

五。華能攝彼，則一顯多隱。一切攝華，則一隱多顯。

顯顯不俱，隱隱不並；隱顯顯隱，同時無礙。

全攝俱泯，存亡俱成，句數同前。

下云：「東方入正受，西方從定起等。」如八日月，隱顯同時。

I 6 微細相容安立門

六。此華葉中，微細剎等，一切諸法，炳然齊現。

下云：「於一塵中，一切國土曠然安住。」

「又於一毛端處，有不可說諸如來。」及第九迴向，微細中說。

I 7 因陀羅網境界門

七。此華葉一一微塵中，各現無邊剎海。剎海之中，復有微塵。

彼諸塵內，復有剎海。如是重重，不可窮盡。非是心識思量境界。

如天帝殿，珠網覆上。一明珠內，萬象俱現，珠珠皆爾。

此珠明徹，互相現影。影復現影，而無窮盡。

下云：「如因陀羅網世界等。」亦如鏡燈，重重交光，佛佛無盡。

I 8 託事顯法生解門

八。見此華葉，即是見於無盡法界。非是託此，別有所表。

下文云：「此華蓋等，從無生法忍之所起等。」

I 9 十世隔法異成門

九。即此一華，既具徧一切處，亦復該一切時。

謂三世各三，攝為一念，故為十世。

以時無別體，依華以立；華既無礙，時亦如之。是故晉經云：

「過去無量劫，安置未來今；未來無量劫，迴置過去世等。」

普賢行云：「過去中未來，未來中現在等。」

又云：「無量劫即一念，一念即無量劫等。」

時無別體，故不別立，以為所依。

I 10 主伴圓明具德門

十。此圓教法，理無孤起，必攝眷屬隨生。下云：「此華即有十世

界微塵數華以為眷屬，又如一方為主，十方為伴，餘方亦爾。」

是故主主伴伴，各不相見，主伴伴主，圓明具德。

G3 結例成異（分二）

H1 舉一例餘 舉華既爾，一塵等事亦然。

如此事華，既帶同時等十義，具此十門。

而此事等具餘教等十門，則為百門。

事法既爾，餘教義等具百亦然，則為千門。

如教義等有此千門，彼同時門中亦具百門。

餘廣狹等例爾亦有千門。若重重取之，亦至無盡。

H2 結勸修益 於此十門，圓明顯了。則常入法界，重重之境。

F2 德用所因（分三）

G1 問答總明（分四）

H1 標舉章明 第二明德用所因。

H2 假問徵起 問：有何因緣，令此諸法得有如是混融無礙？

H3 列數總答 答：因廣難陳，略提十類。

一、唯心所現故；二、法無定性故；三、緣起相由故；

四、法性融通故；五、如幻夢故；六、如影像故；

七、因無限故；八、佛證窮故；九、深定用故；

十、神通解脫故。

H4 總相會通（分三）

I 1 總標功能 十中隨一，即能令彼諸法，混融無礙。

I 2 料揀差別 十中前六，通約法性，為德相因，法爾如是。

後二皆是業用，義通因果。七約起修，義通德相業用。

八約果德，唯是德相故。

I 3 會通德用遮其異釋 前之十門，通德相業用。

約佛則用亦德相，德上用故；

約機則相亦稱用，令知相故。

即用之相，染淨雙融；即相之用，能染能淨。

故相及用，不分兩別。

G2 隨門別釋（分十）

H1 唯心所現故 初、唯心現者。

一切諸法，真心所現，如大海水，舉體成波。以一切

法，無非一心故；大小等相，隨心迴轉，即入無礙。

H2 法無定性故（分三）

I 1 約大小釋 二、法無定性者。既唯心現，從緣而生。

無有定性，性相俱離。

小非定小，故能容太虛而有餘，以同大之無外故。

大非定大，故能入小塵而無間，以同小之無內故。

是則等太虛之微塵，含如塵之廣剎，有何難哉！

I 2 引文證成 舊經十住品云：「金剛圍山數無量，悉能安置一毛端，

欲知至大有小相，菩薩以是初發心。」

I 3 例釋餘法 一非定一，故能是一切；多非定多，故能是一。

邊非定邊，故能即中；中非定中，故能即邊。

延促靜亂等，一一皆然。

H3 緣起相由故（分三）

I 1 總顯 三、緣起相由者。謂大法界中，緣起法海，義門無量。

約就圓宗，略舉十門，以釋前義。

謂緣起法，要具此十義，緣方起故，闕則不成。

I 2 別釋（分十）

J 1 諸緣各異義 一諸緣各異義。謂大緣起中，諸緣相望；

要須體用各別，不相雜亂，方成緣起。

若雜亂者，失本緣法，緣起不成。

此則諸緣，各各守自一位。

文云：「多中無一性，一亦無有多。」

J 2 互徧相資義 二互徧相資義。謂此諸緣，要互相徧應，方成緣起。

如一緣徧應多緣，各與彼多全為一故，

此一則具多箇一也。若此一緣，不具多一，

則資應不徧，不成緣起；此則一一各具一切。

下文云：「知以一故眾，知以眾故一。」

J 3 俱存無礙義 三俱存無礙義。謂凡是一緣，要具前二，方成緣起。

以要住自一，方能徧應；徧應多緣，方是一故。

是故唯一多一，自在無礙鎔融，有其六句。

一或舉體全住，是唯一也；或舉體徧應，是多一也；

或俱存，或雙泯；或總合，或全離，皆思之可見。

文云：「諸法無所依，但從和合起。」

此上三門，總明緣起本法竟。

J 4 異體相入義（分五）

K 1 總釋 四異體相入義。謂諸門力用，遞相依持互形奪故。

各有全有力、全無力義，緣起方成。

K 2 引證 如論云：「因不生，緣生故；緣不生，自因生故。」

K 3 反成 若各唯有力，無無力，則有多果過，一一各生故。

若各唯無力，無有力，則有無果過，以同非緣，俱不生故。

K 4 結成 是故緣起要互相依，具力無力。如闕一緣，一切不成。

餘亦如是。

K 5 示相（分三）

L 1 以一望多（分二）

M1 明一持多依 是故一能持多；一是有力，能持於多。

多依於一；多是無力，潛入一內。

由一有力，必不與多有力俱，是故無有一而不攝多也。

由多無力，必不與一無有力俱，是故無有多而不入一也。

M2 例多持一依 如一持多依既爾，多持一依亦然，反上思之。

L 2 例多望一 如一望多，有依有持，全力無力；

常含多在己中，潛入己在多中，同時無礙。

多望於一，當知亦爾。

L 3 結成句數 俱存雙泯，二句無礙，思之。

J 5 異體相即義（分四）

K 1 立理略明 五異體相即義。

調諸緣相望，全體形奪，有有體無體義，緣起方成。

K 2 反顯前理 若闕一緣，餘不成起故，緣義則壞。

K 3 結成正義 得此一緣，令一切成起；所起成故，緣義方立。

K 4 別示其相（分三）

L 1 以一望多 是故一緣是能起能成，故有體；

多緣是所起所成，故無體。

由一有體，不得與多有體俱；

多無體，必不得與一無體俱。

是故無有不多之一，無有不一之多。

一多既爾，多一亦然，反上思之。

L 2 例多望一 如一望多，有有體無體；

故能攝他同己，廢己同他，同時無礙。

多望於一，當知亦爾。準前思之。

L 3 結成句數 俱存雙泯，二句無礙，亦思之可見。

J 6 體用雙融義（分三）

K 1 立理略明 六體用雙融義。

謂諸緣法，要力用交涉，全體融合，方成緣起。

K 2 開章別釋 是故圓通亦有六句：

一、以體無不用故，舉體全用，則唯有相入無相即義。

二、以用無不體故，舉用全體，則唯有相即無相入也。

三、歸體之用不礙用，全用之體不失體；

是則無礙雙存，亦入亦即，自在俱現。

四、全用之體，體泯；全體之用，用亡。

非即非入，圓融一味。

五、合前四句，同一緣起，無礙俱存。

六、泯前五句，絕待離言，冥同性海。

K 3 總結所屬 此上三門，於初異體門中，顯義理竟。

J 7 同體相入義（分三）

K 1 別釋同義 七同體相入義。

謂前一緣所有多一，與彼一緣體無別故，名為同體。

K 2 例釋即入所以 又由此一緣應多緣故，有此多一；

所應多緣，既相即入，令此多一亦有即入也。

K 3 正釋此門 先明相入，謂一緣有力能持多一，多一無力依彼一緣，

是故一能攝多，多便入一。一入多攝，反上應知。

餘義餘句，準前思之。

J 8 同體相即義（分二）

K 1 明一以望多（分二）

L 1 明本一有體 八同體相即義。

謂前一緣所具多一，亦有有體無體之義，故亦相即。

以多一無體，由本一成，多即一也；

由本一有體，能作多一，令一攝多。

L 2 例多一有體 如一有多空既爾，多有一空亦然。

K 2 例多一望本 餘義餘句，並準前思之。

J 9 俱融無礙義（分二）

K 1 正釋本門 九俱融無礙義。

謂亦同前，體用雙融，即入自在，亦有六句，準前應知。

K 2 結前三門 此上三門，於前第二同體門中，辨義理竟。

J 10 同異圓滿義（分二）

K 1 別釋同義 十同異圓滿義。

謂以前九門總合為一大緣起，令多種義門同時具足也。

由住一徧應，故有廣狹自在門。

由就體就用，故有相即相入門。

由異體相容，具微細門；異體相即，具隱顯門。

又就用相入為顯，令就體相即為隱，即顯入隱亦然。

又由異門即入為顯，令同體即入為隱，同顯異隱亦然。

又由異體相入，帶同體相入，具帝網門。

由此大緣起，即無礙法界，故有託事顯法門。

顯於時中，故有十世門；相關互攝，故有主伴門。

K 2 結屬引證 此第十圓滿一門，就前第三門中，以辨義理。

故下文云：「菩薩善觀緣起法，於一法中解眾多，

眾多法中解了一。」又云：「一中解無量，無量中解一，

了彼互生起，當成無所畏等。」皆其義也。

I 3 總結 上來緣起相由門竟。

H4 法性融通故（分二）

I 1 總顯（分二）

J 1 揀非 第四、法性融通門者。謂若唯約事，則互相礙，不可即入；
若唯約理，則唯一味，無可即入。

J 2 顯正 今則理事融通，具斯無礙。謂不異理之一事，具攝理性時；
令彼不異理之多事，隨所依理，皆於一中現。
若一中攝理不盡，則真理有分限失；
若一中攝理盡，多事不隨理現，則事在理外失。
今既一事之中，全攝理盡。多事豈不一中現？華藏品云：
「華藏世界所有塵，一一塵中見法界。」法界即事法界矣。

I 2 別明（分二）

J 1 結前生後 斯即總意，別亦具十玄門。

J 2 顯正別相（分二）

K 1 別明（分十）

L 1 同時具足相應義

一、既真理與一切法而共相應，攝理無遺，
即是諸門諸法同時具足。

L 2 廣狹自在無礙義

二、事既如理能包，亦如理廣徧，而不壞狹相，
故有廣狹純雜無礙門。又性常平等故純，普攝諸法故雜。

L 3 一多相容不同義

三、理既徧在一切多事，故令一事隨理徧一切中。
徧理全在一事，則一切隨理在一事中，故有一多相容門。

L 4 諸法相即自在義

四、真理既不離諸法，則一事即是真理，真理即是一切事故。

是故此一即彼一切事，一切即一，反上可知。

故有相即自在門。

L 5 秘密隱顯俱成義

五、由真理在事各全非分故，正在此時，彼說為隱；

正在彼時，此即為隱，故有隱顯門。

L 6 微細相容安立義

六、真理既普攝諸法，帶彼能依之事，頓在一中，

故有微細門。

L 7 因陀羅網境界義

七、此全攝理故，能現一切。彼全攝理，同此頓現。

此現彼時，彼能現所現俱現此中；

彼現此時，此能現所現亦現彼中。

如是重重無盡，故有帝網門。以真如畢竟無盡故。

L 8 託事顯法生解義

八、即事同理故，隨舉一事，即真法門，故有託事門。

L 9 十世隔法異成義

九、以真如徧在晝夜，日月年劫皆全在故。

在日之時，不異在劫，故有十世異成門。

況時因法有，法融時不融耶？

L 10 主伴圓明具德義

十、此事即理時，不礙與餘一切恆相應，故有主伴門。

K 2 融通 故一理融通，十門具矣。

H 5 如幻夢故（分二）

I 1 幻 五、如幻夢者。猶如幻師，能幻一物，以為種種；

幻種種物，以為一物等。經云：「或現須臾作百年等。」

一切諸法，業幻所作，故一異無礙。

I 2 夢 言如夢者，如夢中所見廣大，未離枕上；歷時久遠，未經斯須。
故論云：「處夢謂經年，覺乃須臾頃；故時雖無量，攝在一剎那。」

H6 如影像故 六、如影像者。一切萬法，略有二義：
一皆如明鏡，含明了性，一心所成故；
二分別所現，如影像故。
由初義故為能現，由後義故為所現，
故一切法，互為鏡像，如鏡互照而不壞本相。
下經云：「遠物近物，雖皆影現，影不隨物而有遠近等。」

H7 因無限故 七、因無限者。
調諸佛菩薩，昔在因中，常修緣起無性等觀，
大願迴向等稱法界修，及餘無量殊勝因故。
今如所起果，具斯無礙。

H8 佛證窮故 八、佛證窮者。由冥真性，得如性用故。
經云：「無比功德故能爾。」

H9 深定用故 九、深定用者。調海印定等諸三昧力故。賢首品云：
「入微塵數諸三昧，一一出生塵等定，而彼微塵亦不增等。」

H10 神通解脫故 十、神通解脫故者。調由十通，及不思議等解脫故。
不思議法品十種解脫中云：
「於一塵中，建立三世一切佛法等。」

G3 總結所屬 由上十因，令前教義等十對，具上同時等十門，
以為別教一乘義之分齊。